

Minister Beke-Martinez ta felicitá ASOMA cu Festival na Papiamento

ORANJESTAD - Cu hopi duele Minister Dr. Lili Beke-Martinez a expresá cu e no por tabata presente n'e festival di Asoma Diadomingo último pa motibonan di compromisonan gubernamental.

Minister Beke-Martinez a felicitá Directiva di Asoma pa un bon organizacion y cu nan a sa di duna balor na nos idioma Papiamento.

Felicitacion grandi ta bai p'e 3 ganadornan kendenan ta Oslin Trimon como interprete y Jossy Brokke como compositor di e cancion ganador "Juan del Diablo". Igualmente pabien n'e segundo lugar cu a bai pa Joselito Geerman, kende a interpretá e cancion "Enamora di mi isla", un composicion di Casin Giel. Na Arlene Croes kende a terminá na di tres lugar cu e cancion "Isla encantá", cu ta un composicion di Eric Tjong, tambe ta bai palabranan di felicitacion.

Finalmente un pabien di curazón na henter nos comunidad cu e festival aki, y t'e sincero deseo di Minister Beke-Martinez cu esaki por continuá tur aña mirando su balor cultural pa nos isla.

Algun observacion haci ayera dor di algun crítico, ta bisa cu

e cancion por ta na Papiamento, pero e título sigur no ta Papiamento, "Juan del Diablo", cu mas bien ta un figura di un telenovela. Por fabor tuma e critica aki como un constructivo.

PABIEN DHADDY

Pa motibonan di compromisonan di trabao, manera ya mencioná Minister Dr. Lili Beke-Martinez no por tabata presente Diadomingo último n'e lanzamiento di e disco compacto di Dhaddy Brokke, cual produccion ta hiba e number di "Mi orguyo Papiamento".

E produccion di e disco compacto aki den nos dushi idioma Papiamento, ta yega net riba un dia special, unda cu Asoma tambe a duna atencion na nos idioma cu e Festival na Papiamento y tambe ta cuadra cu e filosofía di Aruba 500, esta di duna realce na nos cultura, unda cu sin duda nos idioma Papiamento ta forma un parti esencial di dje.

Minister Beke-Martinez ta felicitá Dhaddy Brokke cu e bunita proyecto aki y ta deseé hopi éxito.